



Aqqalu C. Jerimiassen
Atassut

UKA 2021/51
02. November 2021

Inatsisartut aalajangiiffigisassaattut siunnersuutigineqarpoq, Naalakkersuisut peqquneqassasut pisortanit ikiorsiissutit pillugit allannguuteqaqqullugit1 , taamaalilluni namminerisamik illuutillit aammalu inissianik piginneqatigiillutik pigisallit pisinnaatitaaffigilissagaat pisortanit ikiorsiissutinik ikiorneqarsinnaanngortillugit, kræfteqarlutik nappaateqarnertik ilutigalugu katsorsagassanngoraangamik naliginarmik akissarsiornerit unikallaraangat sulisinnaajunnarnertik pissutigalugu. Nalunaarusiami erseqqissarneqassaaq ajornartorsiut qanoq isikkoqarnersoq aammalu qanoq ikiortarialiunersut taamatut pisinnaatitaaffilissapata. Nalunaarusiaq juli 2022-mi kingusinnerpaamik saqqummiunneqassaaq.

(Inatsisartunut ilaasortaq, Erik Jensen, Siumut)

Nappaassuaq kræft ila kikkorpasuit asannitsigut erligeqisagut tigusarai.

Inuunerlumi taamak ingerlasussaasimammat taamannak nalaataqartarnerit ulluinarni inuunitsinni takusaraagut. Nappaassuarmi kinaassusersiorani misigissuseqaranilu kinannguunersoq kinarsuunersorluunniit eqqortaraa.

Peqqinnissaqarfippit maanna artorsarpoq, aningaasaliuarteraluarlutalu takujuarparput suli maanna artorsartillugu ingerlajuarluta, sulisuimi ulapeqaat, eqiterussiuarsimanerullu annertuumittaaq nakorsiarnissamik atorfissaqartitsisut pissarsiaqartitsilluinnartullu eqqornerlussinnaasartuarlugit.

Nappaassuarmilli eqqugaareernermi aningaasaqarnikkut eqqornerluisarnera, ikiugassaareersunut qaavatigut artukkeeqqittutullusooq inissittarnera imaannaangivissuuvoq qatangiinnagassaanngilluinnartoq.

Ullumikkut isumaginninnermut aningaasatigut ikiorsiisarnermut kippaarilluinnartunik inatsiseqarpugut, 1 kr.-imik sippoqaruit akiligassatit akilereerlugit, tassa aningaasaateqartutut naatsorsuutigineqassaatit.

Taamatuttaarlu ippoq, isertitaqarnerulaartutut inissisimasuusut aningaasarsiorfeeruteriasaarlutik nappaammik eqqugaanermikkut sulisinnaajunnaarallarpata, suli aningaasaateqartussatut naatsorsuutigineqartarput, imaalluni eqqarsartariuseq; nunatsinni atugarissaarnerulaarnissaq inerteqqutaanngiluatsiartutulluunniit inissisimalersimalluni, akissarsiorluartullu ikiorsiissutinik isumalluuteqakkajullutik inissisimasuniik pisoorsuartut tikkuartorneqarsinnaasarlutik asuli imminnut iluarusutsiinnartutut tikkuarniarneqartarlutik.



Eqqaamasassarpulli aana ataaseq, uatsitulli taakkuttaaq aamma inuummata, ikiugassanngortarlutillu allatuulli, imaanngilarmi aningaasarsiorluartutut inissisimagunik naasaanngitsumik kaasarfii imaqartut.

Nappaassuaq eqqornerluippat isertitaqarluaraluaaraanniluunniit, isertitat imaaliallaannaq pissarsiassaajunnaarpata suli akilersugassarpassui ingerlaannassapput, isertitaqarluartummi tassaakkajummatattaq akilersugaqarnerpaakkajuttut malussarissumik inissisimasinnaasut ajalusoornermi.

Taamaattumillu Naalackersuisuttaaq kaammattorusunnarput, nunatsinni inunnut nappaassuarmik eqqugaasimasunut suli iliuuseqarusussutsimik nukissaqarnertik takutissagaat.

Siunnersuut Atassummiit sorutiginaateqartillugu Isumaginninnermut ataatsimiitsitaliamut innersuupparput.